

**Ilinniagaqarnerit inuiaqatigiinni pisariaqartitanut naapertuuttunngorlugit qanoq pilersaarusiussanerusugut pingaarnersiussanersugullu Inatsisartut isumaat pillugu apeqquteqaat aallaavigalugu oqallinnisamik siunnersuut**  
(Inatsisartunut ilaasortaqa Asii Chemnitz Narup, Inuit Ataqtigiit)

**Akissuteqaat**

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalackersuisoq)

Naalackersuisut sinnerlugit qutsavigiumavara Asii Chemnitz Narup, Inuit Ataqtigiit, manna periarfissatsialak iluatsillugu apeqqutinik pingaaruteqartunik saqqummiussaamik, qanoq ilinniartitaanerni pilersaarusiortarlutalu pingaarnersiussanersugut, inuiaqatigiinni pisariaqartitsinerit pitsaanerpaamik naammassiumallutigit. Ilinniartitaaneq annertusiartuinnartumik namminiileriartornitsinni pingaaruteqartumik qitiulluinnartumillu inissisimavoq. Aalajangiisuvoq ilinniartitaanernik aaqqissuussinissarput inuiaqatigiinni unammilligassatsinnut periarfissatsinnullu naapertuuttunik.

Ilinniartitaanernik inuiaqatigiinnut naleqquttunik pilersitsiumalluta, tamatumani atuallerneq sioqqullugu ingerlatsiviusut aamma meeqqat atuarfiat, qaffasinnerusunik ilinniagaqalartarnernut piareersarfiit aamma inuussutissarsiutitigit piginnaangorsarfiusunik ilinniartitaanerit ilanngukkumallugit aalajangiisuvoq piffissami matumani siunissamilu pisariaqartitsinerit, inuiaqatigiinnilu unammilligassagut paasissallutigit. Tamatumani pisariaqarpoq ammasumik oqaloqatigiittoqarnissaa inuussutissarsiortunik, ilinniartitaanernik ingerlatsivinnik, ilinniagaqartunik aamma inuiaqatigiinnik, sulianilu peqqissaartumik nalilersuisarnissarput. Tamatumani aamma isiginiarneqassapput suliffeqarnermi aammalu ilinniartitaanernik aaqqissuussinitsinni unammilligassat aammalu suaassutitigit unammilligassat isiginiagassallu. Tamanna minnerunngitsumik atuuppoq qitiusuni isumassuinermik ingerlatsiviusuni suliani, naatsorsuutigineqarmat siunissami sulisussanik sulianik ilinniarsimasunik amigaateqalernissarput, suliffinni angutit ilinniagarinerusagaanni, taamalu pisariaqarluni suliffeqarnermi aaqqissuussinerit eqaannerunissaat, - tassalu aamma ilinniartitaanerit ilanngullugit.

Tamakkua kingunerisinnaavaat aaqqissuussinertigit allannguuteqartitsisariaqarneq, pitsaassusissatigit ineriartortitsinerimut aningaasaliissuteqarnerulertariaqarneq aamma paasissutissanik pitsaannerusumik atuisariaqarneq aalajangersaasarnerillu nalilersuiffigeqqittariaqarnissaat.

Naalackersuisut neqeroortigisarpaat ilinniartitaanerit amerlasuut siammasissullu. Tamatumani ilaapput inuussutissarsiutinut ilinniartitaanerit, ilinniarnertuunngorniarnermik ilinniartitaanerit aammalu qaffasinnerusunik ilinniartitaanerit. Anguniagaraarput qularnaassallugu ilinniartitaanerni neqeroortitita tamatigoortuunissaat aamma eqaatsumik aaqqissuussaasarnissaat, soqutigisat assigiinngiiaartut pisariaqartitsinerit suliffeqarnermilu pisariaqartitsinivut aamma aqutissiukkumallutigit. Aaqqissuussaasumik pitsaassusissanik ineriartortitsisarneq ingerlaavartumillu nalilersuisarnerit ilinniartitaanernik aaqqissuussinitsinni pisariaqarput, ilinniartitaanerni pitsaassusissat pitsanngorsartuassallugit sammivinni tamani, qularnaassallugulu ilinniartitaanerit ingerlatavut naleqquttuussasut

unammillersinnaassasullu. Ilinniartitaanernik aqqissuussinitsinni immikkoortut taakkua nukittorsassavagut.

Ilinniartitaanernut periusssiassaq nutaaq maanna ineriartortinneqarpoq, tassanilu qitiullutik inissisimapput pitsaassusissanik ineriartortitsisarnerit nalilersuisarnerillu. Ilutigisaanik Naalakkersuisut sulissutigaat nunamut tamarmut atuuttumik ilinniartitaanernut siunnersuisoqatigiinnik arlaannaanulluunniit atasuunngitsunik pilersitsisoqarnissaa. Siunnersuisoqatigiit taakkua peqataaffigissavaat qularnaarneqassasoq ilinniartitaanernut politikkip kinaassusersiunngitsunik siunnersuisarnermik ilisimasanillu tunngaveqartuunissaa. Siunnersuisoqatigiit ilinniartitaanernut sammisunik inassuteqaatinik suliaqartassapput, fagitigut ilinniarsimassuseq siuarsarlugulu qaffasinnerulersinnaaqqullugu. Tamatuma saniatigut siunnersuisoqatigiit peqataaffigisassavaat aningaasaliissutaasut naammassisaqarfiulluartarnissaat, naalakkersuinikkut tulleriiarinernik tunngavilinnik. Anguniagaraarput ilinniartitaanerit ilusilersorlugillu aqqissuulluugaanissaat, pitsaassusissanik isiginnittuunissaat nalilersuivigiuminartuunissaallu.

Kiisalu aamma Naalakkersuisut anguniarpaat qularnaarneqassasoq ilinniartitaanerit peqataatitsisuunissaat periarfissaqartitsinissaallu innuttaasut tamarmik, qanoq tunuliaqutaqarneq apeqqutaatinnagu, suaassuseq fagitigullu angusimasat apeqqutaatinnagit periarfissinneqartassasut. Anguniarparput ilinniartitaanernut iserniarnerni aporfiusartut piiarneqarnissaat, sulissutigarpullu ilinniakkanik ingerlatsiviusut avatangiisit peqataatitsiviusut.

Eqikkarlugu oqaatigineqarsinnaavoq Naalakkersuisut ilinniartitaanernik pilersaarusionerat aamma ilinniartitaanernik tulleriiarisarnerat tunngaveqassammat inuiaqatigiinni pisariaqartitsinernik itisuumik paasinninnernik. Naalakkersuisut ingerlaqqissapput ilinniartitaanernik aqqissuussinitsinni pitsaassusissanut aningaasaliisarlutik, ilutigisaanillu ingerlaavartumik suussuilersorneqartassapput inuiaqatigiinni pisariaqartitsinerit suuneri aammalu inuiaqatigiinni unammilligassavut.

Naalakkersuisuni aalajangiusimavarput ilinniartitaanernik aqqissuussinitsinni ullutsinni unammilligassatta naapigiartuaannarnissaat, innuttaasullu piareersartillugit piujuaannartitsinermik tunngavilimmut unammilleqatigiiffiusumullu siunissamut.

Qilanaaraara soqutigisartumik oqallittoqarnissaa ingerlaqqittumillu suleqatiginneq nunatsinni inuiaqatigiinni ilinniartitaanerit nukittorsarumallutigit inuiaqatigiinnut iluaqutaasussamik.